

Safaniyāh

¹ Zail meñ Rab kā wuh kalām qalamband hai jo Safaniyāh bin Kūshī bin Jīdaliyāh bin Amariyāh bin Hizqiyāh par nāzil huā. Us waqt Yūsiyāh bin Amūn Yahūdāh kā bādshāh thā.

² Rab farmātā hai, “Maiñ rū-e-zamīn par se sab kuchh miṭā ḍālūngā, ³ insān-o-haiwān, parindoñ, machhliyoñ, ṭhokar khilāne wālī chīzoñ aur bedīnoñ ko. Tab zamīn par insān kā nām-o-nishān tak nahīn rahegā.” Yih Rab kā farmān hai.

⁴ “Yahūdāh aur Yarūshalam ke tamām bāshindoñ par merī sazā nāzil hogī. Bāl Dewatā kī jitnī bhī butparastī ab tak rah gaī hai use nest-o-nābūd kar dūngā. Na butparast pujāriyoñ kā nām-o-nishān rahegā, ⁵ na un kā jo chhatoñ par sūraj, chānd balki āsmān ke pūre lashkar ko sijdā karte haiñ, jo Rab kī qasam khāne ke sāth sāth Milkūm Dewatā kī bhī qasam khāte haiñ. ⁶ Jo Rab kī pairawī chhoṛ kar na use talāsh karte, na us kī marzī dariyāft karte haiñ wuh sab ke sab tabāh ho jāenge.

⁷ Ab Rab Qādir-e-mutlaq ke sāmne khāmosh ho jāo, kyoñki Rab kā dīn qarīb hī hai. Rab ne is ke lie zabah kī qurbānī taiyār karke apne mehmānoñ ko maḥsūs-o-muqaddas kar diyā hai.” ⁸ Rab farmātā hai, “Jis din maiñ yih qurbānī chaṛhāūngā us din buzurgoñ, shahzādoñ aur ajnabī libās pahne wāloñ ko sazā dūngā. ⁹ Us

din main un par sazā nāzil karūnga jo tawah-humparastī ke bāis dahlīz par qadam rakhne se gurez karte haiñ, jo apne mālik ke ghar ko zulm aur fareb se bhar dete haiñ.”

¹⁰ Rab farmātā hai, “Us din Machhlī ke Darwāze se zor kī chīkheñ, Nae Shahr se āh-o-zārī aur pahāriyon se karaktī āwāzeñ sunāi deñgī. ¹¹ Ai maktīs muhalle ke bāshindo, wāwailā karo, kyonki tumhāre tamām tājir halāk ho jāenge. Wahāñ ke jitne bhī saudāgar chāñdī tolte haiñ wuh nest-o-nābūd ho jāenge.

¹² Tab main charāgh le kar Yarūshalam ke kone kone meñ un kā khoj lagāūngā jo is waqt baṛe ārām se baiṛhe haiñ, khāh hālāt kitne bure kyon na hoñ. Main un se nipaṭ lūngā jo sochte haiñ, ‘Rab kuchh nahīn karegā, na achchhā kām aur na burā.’ ¹³ Aise logon kā māl lūṭ liyā jāegā, un ke ghar mismār ho jāenge. Wuh nae makān tāmīr to kareñge lekin un meñ raheñge nahīñ, angūr ke bāgh lagāeñge lekin un kī mai pieñge nahīñ.”

¹⁴ Rab kā azīm din qarīb hī hai, wuh baṛī tezi se ham par nāzil ho rahā hai. Suno! Wuh din talkh hogā. Hālāt aise hoñge ki bahādur fauji bhī chīkh kar madad ke lie pukāreñge. ¹⁵ Rab kā pūrā ghazab nāzil hogā, aur log pareshānī aur musibat meñ mubtalā raheñge. Har taraf tabāhī-o-barbādī, har taraf andherā hī andherā, har taraf ghane bādāl chhāe raheñge. ¹⁶ Us din dushman narsingā phūnk kar aur jang ke nāre lagā kar qilāband shahron aur burjon par ṭūṭ paregā. ¹⁷ Rab farmātā hai, “Chūnki logon ne merā gunāh kiyā hai is lie main un ko baṛī

musibat meñ uljhā dūngā. Wuh andhoñ kī tarah ṭaṭol ṭaṭol kar idhar-udhar phireñge, un kā ḳhūn ḳhāk kī tarah girāyā jāegā aur un kī nāsheñ gobar kī tarah zamīn par phaiñkī jāeñgī.”¹⁸ Jab Rab kā ḡhazab nāzil hogā to na un kā sonā, na chāñdī unheñ bachā sakegī. Us kī ḡhairat pūre mulk ko āg kī tarah bhasm kar degī. Wuh mulk ke tamām bāshindoñ ko halāk karegā, hāñ un kā anjām haulnāk hogā.

2

Hosh meñ Āo!

¹ Ai behayā qaum, jamā ho kar hāzirī ke lie kharī ho jā, ² is se pahle kī muqarrarā din ā kar tujhe bhūse kī tarah uṛā le jāe. Aisā na ho ki tum Rab ke saḳht ḡhusse kā nishānā ban jāo, ki Rab kā ḡhazabnāk din tum par nāzil ho jāe.

³ Ai mulk ke tamām farotano, ai us ke ahkām par amal karne wālo, Rab ko talāsh karo! Rāstbāzī ke tālib ho, halīmī ḡhūñḡo. Shāyad tum us din Rab ke ḡhazab se bach jāo. *

Isrāīl ke Dushmanoñ kā Anjām

⁴ ḡhazzā ko chhoṛ diyā jāegā, Askqalūn wīrān-o-sunsān ho jāegā. Dopahar ke waqt hī Ashdūd ke bāshindoñ ko nikālā jāegā, Aqrūn ko jaṛ se ukhārā jāegā. ⁵ Krete se āi huī qaum par afsos jo sāhilī ilāqe meñ rahtī hai. Kyoñki Rab tumhare bāre meñ farmātā hai, “Ai Filistiyoñ kī sarzamīn, ai Mulk-e-Kanān, maiñ tujhe tabāh karūnga, ek bhī bāqī nahīñ rahegā.” ⁶ Tab yih sāhilī ilāqā

* **2:3** Lafzī tarjumā: chhupe rah sako.

charāne ke lie istemāl hogā, aur charwāhe us meñ apnī bheṛ-bakriyoñ ke lie bāre banā leñge. ⁷ Mulk Yahūdāh ke gharāne ke bache huoñ ke qabze meñ āegā, aur wuhī wahāñ chareñge, wuhī shām ke waqt Askqalūn ke gharoñ meñ ārām kareñge. Kyoñki Rab un kā Ḳhudā un kī dekh-bhāl karegā, wuhī unheñ bahāl karegā.

⁸ “Maiñ ne Moābiyoñ kī lān-tān aur Ammoniyōñ kī ihānat par ḡhaur kiyā hai. Unhoñ ne merī qaum kī ruswāī aur us ke mulk ke ḳhilāf baṛī baṛī bāteñ kī haiñ.” ⁹ Is lie Rabbul-afwāj jo Isrāīl kā Ḳhudā hai farmātā hai, “Merī hayāt kī qasam, Moāb aur Ammon ke ilāqe Sadūm aur Amūrā kī mānind ban jāeñge. Un meñ ḳhudrau paude aur namak ke gaṛhe hī pāe jāeñge, aur wuh abad tak wīrān-o-sunsān raheñge. Tab merī qaum kā bachā huā hissā unheñ lūṭ kar un kī zamīn par qabzā kar legā.”

¹⁰ Yihī un ke takabbur kā ajr hogā. Kyoñki unhoñ ne Rabbul-afwāj kī qaum ko lān-tān karke qaum ke ḳhilāf baṛī baṛī bāteñ kī haiñ. ¹¹ Jab Rab mulk ke tamām dewatāoñ ko tabāh karegā to un ke roñgṭe khare ho jāeñge. Tamām sāhili ilāqoñ kī aqwām us ke sāmne jhuk jāeñgī, har ek apne apne maqām par use sijdā karegā.

¹² Rab farmātā hai, “Ai Ethopiyā ke bāshindo, merī talwār tumheñ bhī mār ḡālegī.”

¹³ Wuh apnā hāth shimāl kī taraf bhī baṛhā kar Asūr ko tabāh karegā. Nīnwā wīrān-o-sunsān ho kar registān jaisā ḳhushk ho jāegā. ¹⁴ Shahr ke bīch meñ rewaṛ aur dīgar kāī qism ke jānwar ārām kareñge. Dashtī ullū aur ḳhārpust us ke ṭūṭe-phūṭe satūnoñ meñ baserā kareñge,

aur janglī jānwaroñ kī chīkheñ khīrkiyoñ meñ se gūñjeñgī. Gharoñ kī dahlīzeñ malbe ke dheroñ meñ chhupī raheñgī jabki un kī deodār kī lakaṛī har guzarne wāle ko dikhāī degī. ¹⁵ Yihī us khushbāsh shahr kā anjām hogā jo pahle itnī hifāzat se bastā thā aur jo dil meñ kahtā thā, “Maiñ hī hūñ, mere siwā koī aur hai hī nahīñ.” Āindā wuh registān hogā, aisī jagah jahāñ jānwar hī āram kareñge. Har musāfir “Taubā taubā” kah kar wahāñ se guzaregā.

3

Yarūshalam kā Anjām

¹ Us sarkash, nāpāk aur zālīm shahr par afsos jo Yarūshalam kahlātā hai. ² Na wuh suntā, na tarbiyat qabūl kartā hai. Na wuh Rab par bharosā rakhtā, na apne Khudā ke qarīb ātā hai. ³ Jo buzurg us ke bīch meñ haiñ wuh dahāṛte hue sherbabar haiñ. Us ke qāzī shām ke waqt bhūke phirne wāle bheṛī'e haiñ jo tulū-e-subah tak shikār kī ek haddī tak nahīñ chhoṛte. ⁴ Us ke nabī gustākḥ aur ghaddār haiñ. Us ke imām maqdis kī behurmatī aur shariyat se ziyādatī karte haiñ.

⁵ Lekin Rab bhī shahr ke bīch meñ hai, aur wuh rāst hai, wuh be'insāfī nahīñ kartā. Subah basubah wuh apnā insāf qāym rakhtā hai, ham kabhī us se mahrūm nahīñ rahte. Lekin bedīn sharm se wāqif hī nahīñ hotā.

⁶ Rab farmātā hai, “Maiñ ne qaumoñ ko nest-o-nābūd kar diyā hai. Un ke qīle tabāh, un kī galiyāñ sunsān haiñ. Ab un meñ se koī nahīñ guzartā. Un ke shahr itne barbād haiñ ki koī

bhī un meñ nahīn rahtā. ⁷ Maiñ bolā, ‘Beshak Yarūshalam merā khauf mān kar merī tarbiyat qabūl karegā. Kyoñki kyā zarūrat hai ki us kī rihāishgāh miṭ jāe aur merī tamām sazāeñ us par nāzil ho jāeñ.’ Lekin us ke bāshinde mazīd josh ke sāth apñī burī harkatoñ meñ lag gae.” ⁸ Chunāñche Rab farmātā hai, “Ab mere intazār meñ raho, us din ke intazār meñ jab maiñ shikār karne ke lie uṭhūngā. * Kyoñki maiñ ne aqwām ko jamā karne kā faisla kiyā hai. Maiñ mamālik ko ikaṭṭhā karke un par apnā ghazab nāzil karūngā. Tab wuh mere saḥt qahr kā nishānā ban jāenge, pūrī duniyā merī ghairat kī āg se bhasm ho jāegī.

Isrāil ke lie Naī Ummīd

⁹ Lekin is ke bād maiñ aqwām ke honṭoñ ko pāk-sāf karūngā tāki wuh āindā Rab kā nām le kar ibādat karen, ki wuh shānā bashānā kharī ho kar merī kḥidmat karen. ¹⁰ Us waqt mere parastār, merī muntashir huī qaum Ethopiyā ke dariyāoñ ke pār se bhī ā kar mujhe qurbāniyāñ pesh karegī.

¹¹ Ai Siyyūn Beṭī, us din tujhe sharmsār nahīn honā paregā hālāñki tū ne mujh se bewafā ho kar nihāyat bure kām kie haiñ. Kyoñki maiñ tere darmiyāñ se tere mutakabbir shekhibāzoñ ko nikālūngā. Āindā tū mere muqaddas pahār par maḡhrūr nahīn hogī. ¹² Maiñ tujh meñ sirf qaum ke gharīboñ aur zarūratmandoñ ko chhoṛūngā, un sab ko jo Rab ke nām meñ panāh leñge. ¹³ Isrāil kā yih bachā huā hissā na ghalat

* **3:8** Ek aur mumkinā tarjumā: gawāhī dene ke lie.

kām karegā, na jhūṭ bolegā. Un kī zabān par fareb nahīn hogā. Tab wuh bheṛoñ kī tarah charāgāh meñ chareñge aur ārām kareñge. Unheñ ḍarāne wālā koī nahīn hogā.”

¹⁴ Ai Siyyūn Beṭī, ḵhushī ke nāre lagā! Ai Isrāīl, ḵhushī manā! Ai Yarūshalam Beṭī, shādmān ho, pūre dil se shādiyānā bajā.

¹⁵ Kyoñki Rab ne terī sazā miṭā kar tere dushman ko bhagā diyā hai. Rab jo Isrāīl kā Bādshāh hai tere darmiyān hī hai. Āindā tujhe kisī nuqsān se ḍarne kī zarūrat nahīn hogī.

¹⁶ Us din log Yarūshalam se kaheñge, “Ai Siyyūn, mat ḍarnā! Hauslā na hār, tere hāth ḍhīle na hoñ. ¹⁷ Rab terā Ḵhudā tere darmiyān hai, terā pahalwān tujhe najāt degā. Wuh shādmān ho kar terī ḵhushī manāegā. Us kī muhabbat tere qusūr kā zikr hī nahīn karegī balki wuh tujh se intahāi ḵhush ho kar shādiyānā bajāegā.”

¹⁸ Rab farmātā hai, “Maiñ īd ko tark karne wāloñ ko tujh se dūr kar dūngā, kyoñki wuh terī ruswāi kā bāis the. ¹⁹ Maiñ un se bhī nipaṭ lūngā jo tujhe kuchal rahe haiñ. Jo langaṛātā hai use maiñ bachāūngā, jo muntashir haiñ unheñ jamā karūngā. Jis mulk meñ bhī un kī ruswāi hūi wahāñ maiñ un kī tārif aur ehtirām karāūngā.

²⁰ Us waqt maiñ tumheñ jamā karke watan meñ wāpas lāūngā. Maiñ tumhare deḵhte deḵhte tumheñ bahāl karūngā aur duniyā kī tamām aqwām meñ tumhārī tārif aur ehtirām karāūngā.” Yih Rab kā farmān hai.

Kitab-i Muqaddas
The Holy Bible in Urdu, Urdu Geo Version, Roman
Script

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-05-06

PDF generated using Haiola and XeLaTeX on 11 Nov 2022 from source files dated 7 May 2022

123ff8cb-27b3-5817-a02a-22e67145fd30